

Dörfligeischer 1977

Der FC Biel dä schuttet, s'isch z' erbarme,
Mit Gummichnöi und schlampig müede Arme,
Mir hei e Vorschlag, do tüe mir druf wette,
E Riese-Aff als Goalie – Der King-Kong chönnt ne rette !

Der eint, dä bletteret inere Zytig,
Der anger nüschelet nöime anderwytig,
Und vore dra chasch e Mönschschlange geseh,
Das isch es Standard-Bild vom ne Post-Guichet !

Mir Bieler bruche doch im See kei's Unghüür,
Das Unghüür z' fuetere, das chämi viu z' tüür,
Mir tüe üs angers vo üsem Gäld befreie,
Und 's bir Seematte i die Unghüür-Boustell gheie !

Jo wenn e Lade nümme tuet räntiere,
De tuet me Chef und Buezer halt spediere,
Nur bim Staats-Lade chunsch de nid rächt druus,
Wieso blibt de Bundesrat im Bundeshuus ?

U we's bim EHC isch z'friede gloffe,
De wird de bi de Fän's no eine gsoffe,
Nur Mario, äs sötti nid pässiere,
Dass du bim Rückwärts-Ässe tuesch dis Biss verliere !

D' Bieler Busbetriebe die wie in sy,
Denn guete Chundedienscht söu schyn's e Gwinn sy,
Nur fürchte mir, s' chönnt ds Gägeteil passiere
We me bir Tür d' Lüt elektrisch tuet massiere !

Im Lädeli muesch d' War bar go choufe,
Denn ohni Bärgäld tuet es Gschäft nid loufe,
Und fähle dir für's choufe dini Franke,
So geisch uf d' Madretschkasse schwarz go Chole tanke !

Der Monbaron und Moser sy feini Herre,
Die ihre Schuldebärg ständig tüe vermehre,
Der Stüürvogt luegt das a mit mildem Lache:
"Si chöi's fasch so guet wie d' Stadtverwaltig mache !"

Üses Volkshuus tuet halt nümme räntiere,
Es chönn kei Beizer meh die Pinte führe,
Mir wüsse eine, dä miech die Spunte z' loufe:
Löt se doch als Meitschiheim vom Vatti choufe !

Gäu Wäutu Mässerli, gisch Töfflistunde,
Schiin's gäge Obe bim Seeufer unde,
Nur sött'sch dere Schüelerin nid Ouge mache,
Süscht loht no mängi Ihre Töff i See lo chrache !

Vo Johr zu Johr, do chöit dir schlächter loose,
Was mir als Schnitzubank is Ohr euch bloose,

Mir si nid gram, mir tüe das nid vergässe,
Dass dir alli Johr gäng meh und tüürer müeset frässe !

Jetzt müesste mir es Äxtra-Värsli bringe,
Zum zähte Värsli-Obe eine singe,
Nur leider fällt üs do kei's Värsli y,
Drum lö mir halt dä Jubiläums-Värs lo sy !